

Tujuh inisiatif digaris – TPM

Utusan Online

22 Jun, 2012

Oleh Ali Mahmood

KUALA LIPIS 21 Jun - Kerajaan menggariskan tujuh inisiatif di bawah Transformasi Pendidikan Orang Asli bagi melonjakkan kecemerlangan pendidikan kaum itu di seluruh negara ke tahap membanggakan.

Timbalan Perdana Menteri, Tan Sri Muhyiddin Yassin berkata, inisiatif itu turut merangkumi usaha mengurangkan kadar keciciran di kalangan murid Orang Asli yang kini berjumlah 30 peratus.

Justeru, katanya, diharapkan inisiatif itu dapat mengurang atau menghapuskan terus kadar keciciran di kalangan pelajar Orang Asli dalam tempoh lima tahun akan datang.

"Kita ingin memastikan mereka berjaya mendapat pencapaian akademik sekurang-kurangnya Sijil Pelajaran Malaysia (SPM)," katanya.

Beliau yang juga Menteri Pelajaran berkata demikian ketika berucap pada Majlis Pelancaran Transformasi Pendidikan Orang Asli Kebangsaan di Sekolah Kebangsaan Betau dekat sini hari ini.

Turut hadir, Menteri Besar, Datuk Seri Adnan Yaakob, Pengerusi Jawatankuasa Pembangunan Luar Bandar dan Hal Ehwal Orang Asli negeri, Datuk Wan Rosdy Wan Ismail dan Ahli Parlimen Cameron Highlands, Datuk S. K. Devamany.

Menurut Muhyiddin, tujuh inisiatif itu turut melibatkan pengambilan 25 guru Orang Asli sebagai langkah permulaan di bawah Program Khas Ijazah Sarjana Muda Perguruan (PISMP).

Katanya, mereka yang terpilih di bawah inisiatif keempat ini akan mengikuti pengajian di Kampus Tengku Ampuan Afzan, Institut Pendidikan Guru Kuala Lipis bermula Julai ini.

"Usaha ini bertujuan supaya lebih ramai guru dalam kalangan Orang Asli dapat berkhidmat kepada masyarakat mereka sendiri di samping mengimbangi kadar bilangan guru mengikut kaum," katanya.

Menurut Muhyiddin, inisiatif pertama di bawah transformasi ini adalah memantapkan tadbir urus sekolah yang mempunyai murid Orang Asli dengan memastikan segala isu dan permasalahan anak-anak kaum itu dapat diselesaikan segera.

"Inisiatif kedua adalah memasukkan elemen Pendidikan Asas Vokasional (PAV) di peringkat menengah rendah di semua sekolah menengah harian yang menjadi tumpuan masyarakat Orang Asli.

"Kerajaan juga sedang merangka mewujudkan jawatan Pembantu Pengurusan Murid dari kalangan Orang Asli bagi membantu guru mengurus penyediaan makanan, penjagaan diri dan kebersihan murid,"ujarnya.

Inisiatif kelima pula, katanya, adalah penambahbaikan kemudahan infrastruktur dan prasarana pendidikan Orang Asli.

Muhyiddin berkata, inisiatif keenam adalah memperkasa jalinan kerjasama melalui hubungan yang lebih strategik dengan rakan sinergi, rakan di lapangan serta rakan antarabangsa bagi membolehkan hasrat untuk merealisasikan transformasi itu tercapai.

"Inisiatif ketujuh adalah mewujudkan satu Sistem Pengesanan Prestasi Sekolah dan murid Orang Asli yang turut mengandungi aspek pengauditan pencapaian prestasi sekolah-sekolah dan murid Orang Asli yang bertujuan untuk membuat penambahbaikan dan pembetulan dari semasa ke semasa," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/info.asp?y=2012&dt=0622&pub=Utusan_Malaysia&sec=Dalam_Negeri&pg=dn_04.htm